

Badische Landesbibliothek Karlsruhe

Digitale Sammlung der Badischen Landesbibliothek Karlsruhe

**Meditationum evangelicarum pars tertia, hoc est:
Tractatio evangeliorum tam dominicalium, quam
festivalium, ad recte se sub variis tentationum generibus
gerendum, disposita**

Creide, Hartmann

Francofurti ad Moenum, 1682

Exegesis

[urn:nbn:de:bsz:31-126133](#)

spirituali domui sua, quæ Ecclesia est, i.
Tim. 3. v. 15. & quidem in omni benedi-
ctione spirituali in cœlestibus, Eph. 1. v. 3.
ut non injuriā alloquamur animam no-
stram cum Davide: Benedic anima mea
Domino, Psal. 103. v. 1. 5.

Deinde, sicut Josepho omnia prosperè
succedebant; nam Dominus cum ipso
erat: Ita de Christo dicitur, quod unxe-
rit eum Deus Spiritu sancto & virtute:
hinc pertransiit benefaciendo & sanando
omnes oppressos à Diabolo, Acto. 10.
v. 38.

Tertiò, veluti Joseph ab uxore Domini
sui calumniis laceratus, & carceri inclusus,
tandem ab ipso Rege exaltatus, & Pro-
Rex Ægypti constitutus est: Ita Synagoga
Judaica agnoscere noluit amplissima illa
beneficia, quibus illi Servator obviabat,
sed omnia calumniis & convitiis proscidit,
nec cessavit, donec in ligno eum suspen-
dit, crucifixum occiderit, & tandem in se-
pulchro, velut in obscuro carcere conclu-
serit, putavitque non amplius eum con-
surreeturum, Psal. 41. v. 9. Verum Patet
ejus cœlestis suscitavit illum à mortuis, &
constituit ad dexteram suam in cœlestibus,
Eph. 1. v. 20. ut non modò in Ecclesiâ
militante in histeris præclarum illud èpi-
visor canatur: Omnia bene fecit: sed mi-
nistrant quoque ipsi decies centena millia
Angelorum, Dan. 7. v. 10. & canunt cum
jubilo: Nunc facta est salus, & virtus, &
Regnum Dei nostri, & potestas Christi
ejus: quia projectus est accusator fratum
nostrorum. Propterea lætamini cœli, &
qui habitant in eis, Apoc. 12. v. 10. 12.

Præclarum exemplum habemus in præ-
lectâ Pericope, ubi Christus surdum &

mutum restituit, ut perfectè ille audire &
loqui potuerit. Id insuper habebant
Pharisi: at turba probè perspiciebat, mi-
raculum hoc à Deo esse, idè suprà mo-
dum admirantes, dicebant: Omnia bene
fecit.

Nos instituti nostri memores vide-
bimus

- I. *Tripliçem Querelam.*
- II. *Tripliçem Medelam.*
- III. *Tripliçem Cautelam.*

J. J.

Exegesis.

Nostri homunciones, propter la-
plum Protoplastorum, quasi Satanæ
mancipia facti sumus, quos laqueis suis ir-
retivit, à quo captivi tenemur ad ipsius
voluntatem, 2. Tim. 2. v. ult. idè de filiâ
illa Abrahæ dicitur, quod alligaverit eam
Satanas spiritu infirmitatis, Luc. 13. v. 16.

Eiusmodi laquei plurimi sunt. In præ-
lectâ Pericope unus exhibetur, cuius aures
alligavit, ut audire, & linguam, ut loqui
non possit: Eo miserat hujus viri condi-
tionem! At Christus vel verbo illum cu-
ravit. Nam Ephata dixit, quod est, ada-
perire. Et statim apertæ sunt aures ejus,
& solutum est vinculum linguae ejus, & lo-
quebatur rectè.

Querela respicit

1. *Morborum corporalium frequentiam.*
Peccato hoc acceptum ferendum: Qui
enim delinquit in conspectu ejus, qui fecit
eum, incidet in manus Medici, Sir. 38. v. 15.
In Paradiso nullus morbus locum habui-
set: sed arbor vite hominem in perpetua
sanitate conservasset, Genes. 2. vers. 17.

ccc

post-

postquam verò Diabolo ille ad sensit, ut contrà Dei interdicum de fructu arboris in medio horto, qua nomen de scientia habuit, decerpserit & comedet, cum peccato mors, ejusque antesignani variis morbi introducti sunt, ut nunc omnes mortiamur, & quasi aquæ dilabamur in terram, qua non colliguntur, 2.Sam.14. v.14.

Julius Cæsar cepit cervum, quem monili ornatum, his verbis dimisit: Hoc me Cæsar donavit. Hic cervus post mille annos à Corolo, Galliæ Rege captus est, ut Simon Majolus scribit.

Nos Dilecti! & ipsi monile gestamus, quod est peccatum, & varia ex peccato fluentia mala, de hoc non incommodè dicere possumus: Hoc nos Adam donavit, ut hodi eten pòst quinque mille annos in his miseriis degamus, & querelam hanc ingeminare teneamur: Patres comederunt uam acerbam, & dentes filiorum obstruerunt, Ezech.18.v.2.

Quemadmodum igitur in Nosocomio aliquo, omnia conclavia infirmis repleti sunt, cœcis, claudis, surdis, leprosis, paralyticis, hydropticis, aliisque id genus hominibus: Ita & mundus ejusmodi Nosocomium est, plenum ægrotis, ubi quilibet infirmitatibus suis laborat, ut non abs re Lutherus dixerit: *Quot membra, tot mortes.* Hic claudus est ut Mephiboseth, 2.Sam.4. v.4. ille cœcus, ut Tobias, Tob.2.v.11. iste pestilentia laborat, ut Hiskias, Esa.38.v.21. Hic paralysi, ut servus Centurionis, Matth.8.v.6. iste febri, ut socrus Petri, Matth.8. v.14. iste leprâ, ut Naaman, 2.Reg.5. v.1. infectus est. Hic mutus est & surdus, ut miseria speculum in Evangelio, ille æger

pedibus, ut Assa, 1.Reg.15.v.24. iste clandestino dolore percitus, ut Paulus, qui stimulum ejusmodi in carne sensit, 2.Cor.12. v.7. Et quis omnes infirmitates enarrabit, quibus homo ob peccata obnoxius est. Nam caro ejus dum vivet, dolebit, & anima illius in ipso lugebit, Job.14.v.ult.

Hæc consideratio meritò superbiam reprimat. Sumus enim nihil nisi terra & cinis, ut Abraham dicit, Genef.18. v.27. & gerimus corpora infirmitatis, Phil.3.v.ult. mortalia corpora, Rom.8 v.11. corpora peccati, Rom.6. v.6. qua fæno & flori agri comparantur, Psal.103. v.15. & ut vapor transeunt, Jac.4.v.14. Ecquid igitur superbiamus? Nihil sanctæ causæ est: omnes enim mortem circumferimus, & licet quis pulchritudine Absolonem, 2.Sam.14.v.25. aut fortitudine Samsonem, Jud.15. v.15. aut divitiis Salomonem æquaret, 1.Reg.10. v.23. attamen mortem non evitabit: sed immotum manet effatum Dei Terra es, & in terram reverteris, Gen.3. v.19. Sir.10.9.

II. *Miseria spiritualis coherentiam.* Coram Deo enim meri Nabales seu stulti sumus, qui non intelligimus, qua pacis nostra sunt, Luc.19.v.42. propterea Deus ipse nos equis & mulis confert. Psal.32. v.10. quin & boves & asinos nobis præfert, qui præsepe Domini sui agnoscunt, Esa.1.v.3. nos verò adeò rudes sumus, ut sæpè oculis nostris non videamus, aut ibus nostris non audiamus, & corde nostro non intelligamus, Esa.6.v.10.

Evidem multi habent prurientes aures, ut nova captent, sicut Athenienses, Act.17.v.20. sed verbum Dei ipsis onus est, Jer.23.v.39. & intolerabile ipsis videatur, si per horulam cultui divino interesset de-

debeant, ut Judæi dicebant: Quando transibit mensis, & venundabimus frumenta, & Sabbathum, & aperiamus frumentum, Amos 8. v. 5.

Sic & multi occurrunt, qui promti sunt ad stultiloquium, aut securitatem, Eph. 5. v. 4. aut ad execrationes & blasphemias, ut Rabsaces, 2. Reg. 19. v. 6. obmutescunt verò ad loquendam justitiam, Psal. 58. v. 2. Hinc canes muti inveniuntur in Ecclesia non valentes latrare, Esa. 56. v. 10. sed placenta loquuntur auditoribus, propter pugillum hordei, & fragmen panis. Ezech. 23. v. 39.

Occurrunt canes muti inter Magistratus, qui hominum iram magis verentur quam Dei, aut munieribus se corrumphi sicut: Xenia & dona excœcant oculos judicum, & quasi ligamentum in ore avertit correptiones eorum, Sir. 20. v. 31.

Quin & canes muti sese offerunt in vita communi, quando Parentes in disciplinâ negligentes sunt, ut Eli, 1. Sam. 3. v. 13, sive socordes sunt ad psallendum, ut pudeat eos laudis Dei, Sir. 51. v. 37. quod clarè indicat, parum devotionis in corde esse. Ex abundantia enim cordis os loquitur, Matth. 12. v. 34. iccirco indigni sunt, quibus Deus oculum videntem, aurem audientem, & linguam loquentem concederit: quia membris his tantum ad peccata abutuntur, & membra iniquitatis exhibeat, quibus rectius servire justitiae debebant, Rom. 6. v. 19.

Sicut igitur Christus dixit Ephata, & hoc verbo aures ejus aperuit, & vinculum linguae ejus solvit: Ita adhuc hodiè verbi Præcones, quasi tuba exaltent vocem suam, Esa. 58. v. 1. & spiritualibus his mutis

ac surdis acclament: Ephata, adaperi aures tuas, peccator obstinate! & verba vitae fuscipe, Joh. 6. v. 69. quæ potentia Dei sunt, ad salutem omni credenti, Rom. 1. v. 16. Ephata, & vide salutem, quam facit Dominus in populo suo, Exod. 14. v. 13. Ephata, adaperi labia, & ora semper ad Dominum, & suscipiet orationem tuam, sicut sacrificium vespertinum, Psal. 141. v. 2. dabitque tibi petitiones cordis tui, Psal. 37. v. 4. Hoc si non attenditur, aliquando dicetur: Inferne Ephata! ubi ejusmodi contentores gratiæ ad infernum detrahentur, ad latus lacri, Esa. 14. v. 15. in quo non est aqua, Zach. 9. v. 11. sed ignis & ligna multa: flatus Domini, sicut torrens sulphuris succendens eam, Esa. 30. v. ult.

III. Rerum prohibitarum appetentiam. Quantò magisturbæ Christus præcipiebat ne cui dicerent, tantò magis prædicabant.

Idem hodiè tenus accidit. Principio Deus hominem ad imaginem suam condiderat, ut Creatorem suum perfectè agnosceret, nec modò voluptate caperetur, ad voluntatem ejus vivendi: sed & vires aderant, ut idem in summa perfectione præstare posset. Quia verò ex destinata malitia à Creatore suo descivit, & ad Satanæ impulsu de arbore veritatis comedit: imaginem Dei cum concreata justitia & sanctitate ille derelidit, & ejus loco successit ignoratio in intellectu, ut homines natura nunc tenebrae sint, Ephes. 5. v. 8. nec sapient ea, quæ Dei sunt, sed ea, quæ hominum, Matth. 16. v. 23. malitia in corde, ut omne fragmentum cogitationum cordis ejus tantummodo malum sit omnibus diebus, Genes. 6. v. 18. & repugnatio in voluntate, ut homo post lapsum nihil aliud sit, quam

Decalogus inversus. Quæ enim lex iubet, non facit, quæ verò prohibet, ad ea facienda proclivis est, ut Paulus de Iesu Christo conqueritur, Rom. 7. v. 22. & ut Poëta canit:

Nitimus in vetitum semper cupimusque negata.

Ideam habemus in Israëlitis, quibus verè applies: *Semper contrarius esto.* Sermonem quem locutus es ad nos in nomine Domini, non audiemus ex te: sed facientes faciemus omne verbum, quod egreditur de ore nostro, Jer. 44. v. 16. Vide Exod. 16. v. 27. Num. 14. v. 44. 2. Chron. 36. v. 16.

Nos multa exempla eminus arcessere non opus est: Filii hujus seculi hodierno die hoc vitio laborant, ut Spiritus sancti regimen non suscipiant, sed dicant: Mandata, remanda, remanda, Esa. 28. v. 16.

Id quotidiè experiuntur fideles verbi Praecones. Quantò magis enim flagitia hominum, quæ passim in valuerunt, fervente zelo taxant: tanto illi magis obstinate resistunt. Hinc quidem gementes illi faciunt officium suum, Hebr. 13. vers. 17. at Deus tempore suo id requiret, & retribuet illis, unicuique tetributionem in caput ipsorum, Sir. 17. v. 19. Qui igitur nocet, noceat adhuc: & qui justus est, justificetur adhuc, Apoc. 22. v. 11. die ultimo, videbimus, quid inter sit inter justum & impium, & inter servientem Deo, & non servientem ei, Mal. 3. v. ult.

De Secundo.

Sequitur Medela, quæ fluit
1. Ex Christo digate, quem infirmi hu-

jus auriculæ immisit, & eo auditum ipsi restituit. Non enim comparatum est cum Servatore nostro, ut cum idolo Dagon, cuius palmæ manuum abscessæ erant, 1. Samuel. 5. v. 4. Sed duo habet brachia, & duas manus, dextram & sinistram. Sinistra vulnerat, dextera verò mederur, & sanat vulnera, quæ percussit, Job. 5. v. 18.

Sicut igitur aliæ quælibet manus naturaliter quinque digitos habet: sic & Christus Servator quinque digitis praeditus est.

Primus est pollex, à pollendo, & notat divinam ejus omnipotentiam, qua potest subjecere sibi omnia, Phil. 3. v. ult.

Secundus est index, quâ nos in via vita instruit, Psal. 32. v. 8. & quanta pati nos oporteat, pro nomine ejus, indicat, Acto. 19. v. 26.

Tertius est medius, & signat miracula ejus, quæ nemo facere potest, nisi fuerit Deus cum eo, Joh. 3. v. 2. quemadmodum enim medius longissimus est, & longissime extenditur: sic & Christi virtus & omnipotentia extendit se super omnia, quæ in cœlo & in terra sunt, in mari & in omnibus abyssis, Psal. 135. v. 6.

Quartus vocatur Medicus, in quo aurei annuli gestantur, quia opinio est, ab hoc digito venulam ad cor perstringere, quod cum auro singularem *συμπάθειαν* habeat, & eō corroboretur. Illo indicatur, Christum esse Sanatorem nostrum, Exod. 15. v. ult. & petram cordis nostri, Psal. 73. v. 26. quin & protectorem vitae nostræ, Psal. 27. v. 2. Sicut omnes laborantes & oneratos ad se vocat, ad reficiendum illos, Matth. 11. v. 28.

Quintus isque *minimus,* dicitur *auricula-*
ris,